

Aus Hessen / vom 9. Julij, Anno 1623.

**N**ach dem das Lauenburgische Regiment von Herzog Christian in der Herrschafft Pleßse zerrent / auch der Obriste Wachtmeister *Moutigni*, neben noch 40. Personen gefangen bekommen / haben sich die Bävrische zu rechnen vnterstanden / dahero ins Amt Rotenburg / am Hark / deme von Lünenburg zustendig / gefallen / vnd in die 14. Dörffer geplündert / vnd ausgebrandt / welches dem Herzog Georgen von Lüneburg sehr *alterirt*, vnd dahero man vermeint / derselbe als ein Feld Obrister des Nieder Sächsischen Träuses sich mit seiner *Armee* zum Herzog Christian schlagen werde / Was aber Herzog Christian anlangen thut / der ruhet nicht / weder tag noch nacht / sondern Scharmusket ohne vnterlass mit den Tillyschen / mit 1000. 2000. 3000. bisweilen 6000. Mann auff / vnd ab / dahero beyderscits viel Volcks bleibet.

Den  $\frac{13}{17}$  Julij sein sie so hart an einander gewest / das Tilly das Feld räumen / seine Bagagi / vnd alles Viehe / so er bey sich gehabt / dahinden lassen müssen / vnd er sich mit der ganzen *Armee* auff die 2. weil nacher Niedergandern / zwischen Allendorff / vnd Wikenhausen / vnd also ins Land zu Hessen *reteriren* müssen / hat also / das Eyßfelde quitirt / vnd *sedem belli* in Hessen genommen / Herzog Christian folget ihne nach / Vnd weiln Tilly ein new Lager zwischen den Bergen zu Niedergandern *formirt*, hat Herzog Christian durch anleitung der verdorbenen Hessischen Sawern / vnd abhawung etlicher Bäume seine Stück auff die Berge gebracht / spielet dermassen ohn vnterlass zu tag vnd nacht ins Lager / das mans auff 5. meilen eigentlich hören kan / vnd thut durch gute erfahrene Büchsenmeister mächtigen schaden im Tillyschen Lager.

Der von Mansfeldt ist im anzug / vnd hat der vorrab das Städtlein Suttendorff / dem Graffen von Bentheim zustendig / vnd nicht weit von Münster gelegen / eingenommen / die darinn ligende Anholtische Garnison alle niedergehawen / fernern erfolg / gibt die zeit.